



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 470 / prot.
/ 6

Tiranë, më 05.06.2025

VENDIM

Nr. 1183, Datë 05.06. 2025

**“MBI AUTORIZIMIN E PËRQENDRIMIT TË REALIZUAR NËPËRMJET KRIJIMIT TË NJË
NDËRMARRJE TË PËRBASHKËT ME FUNKSIONE TË PLOTA INTER STOCK Albania
SHPK, NGA SHOQËRITË AGNA SHA DHE INTER STOCK SHPK”**

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 05.06. 2025, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një ndërmarrje të përbashkët me funksione të plota INTER STOCK Albania SHPK, nga shoqëritë AGNA SHA DHE INTER STOCK SHPK.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet krijimit të një ndërmarrje të përbashkët me funksione të plota INTER STOCK Albania SHPK, nga shoqëritë AGNA SHA dhe INTER STOCK SHPK.

VËREN SE :

I. Palët në transaksion dhe procedura

Autoriteti i Konkurrencës është njoftuar mbi transaksionin e krijimit të një ndërmarrje të përbashkët me funksione të plota INTER STOCK Albania SHPK nga shoqëritë AGNA SHA dhe INTER STOCK SHPK.

Referuar dokumentacionit të depozituar, palët në transaksion janë:

Pala 1: AGNA SHA është një shoqëri aksionare, e themeluar sipas legjislacionit shqiptar, me objekt aktiviteti: import-export të mallrave industriale e ushqimore, materiale ndërtimi, prodhime bujqësore dhe blegtorale, prodhim e shitje pije alkoolike; në fushën e investimit në ndërtim, në fushën e shitblerjes së trojeve për ndërtim, për turizëm, fshatra turistike, moteleri dhe hoteleri; tregtim import - eksport i produkteve dhe nënprodukteve të duhanit; shitblerje, marrje ose dhënie me qera të pasurive të paluajtshme dhe atyre të luajtshme; veprimtari trajnuese dhe çertifikuese të punonjësve të administratës publike, punonjësve të institucioneve arsimore; auditimi, mbikëqyrja dhe certifikimi i zbatimit të standardeve ndërkombëtare për institucionet në përgjithësi dhe/ose personelin e tyre në veçanti etj.

Shoqëria AGNA SHA kontrollohet nga z. Kosta Sotiri me 32.5% të aksioneve, z. Vasil Naçi me 32.5% të aksioneve, z. Kristo Naçi me 30% të aksioneve, z. Aleksandër Naçi me 5% të aksioneve.

Sipas të dhënave të QKB shoqëria AGNA SHA zotëron kuota në shoqëri të cilat operojnë në tregun e prodhimit të energjisë elektrike; në tregun e ndërtimit dhe në tregun e hotelerisë.

Pala 2: INTER STOCK SHPK është një shoqëri me përgjegjësi të kufizuar, e themeluar sipas legjislacionit të Kosovës dhe adrese në Prishtinë. Objekti kryesor i aktivitetit të shoqërisë është :Aktivitetet e ndërmjetësimit për shitjen e tekstileve, veshjeve, gëzofit, këpucët dhe artikujt e lëkurës, dhe aktivitete të tjera në tregti me shumicë dhe pakicë të veshjeve, këpucëve dhe artikujve prej lëkure në dyqane të specializuara; artikuj elektronike dhe elektroshtepiake në dyqane të specializuara; magazinim, ruajtje dhe transport mallrash, etj.

Referuar të dhënave të regjistratit të Agjencisë së Biznesit në Kosovë, rezulton se shoqëria INTER STOCK SHPK zotërohet nga z. Armend Kadriu dhe nga z. Edmond Kadriu.

Ndërmarrje e Përbashkët (JV): INTER STOCK Albania SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti: Hapja njësive tregtarë dhe atyre ndihmëse, për tregtimin me pakicë të veshjeve të të gjitha llojeve dhe materialeve, të këpucëve, aksesoreve të ndryshëm dhe produkteve të kozmetikës, si dhe çdo produkti tjetër të ngjashëm me përshkrimin e mësipërm. Çdo lloj veprimtarie tjetër tregtare që nuk vjen në kundërshtim me Ligjin.

II. Transaksioni

Kuvendi i Aksionareve të shoqërisë INTER STOCK SHPK dhe Asambleja e Aksionareve të shoqërisë AGNA SHA, me vendimet respektive, kanë vendosur për themelimin bashkërisht të një shoqërie të re, me përgjegjësi të kufizuar, me kapital 1,000,000 lekë, i ndarë në dy kuota, ku secili nga ortakët themelues do të zotërojë:

- Shoqëria AGNA SHA, do të ketë në pronësi një kuotë, që do të përbëjë 51% të kapitalit të shoqërisë së re....
- Shoqëria INTER STOCK SHPK do të ketë në pronësi një kuotë, që do të përbëjë 49% të kapitalit të shoqërisë së re....

Emri i shoqërisë së re do të jetë INTER STOCK Albania SHPK dhe aktiviteti kryesor i saj do të jetë: *Hapja e njësive tregtare dhe atyre ndihmëse për tregtimin me pakicë të veshjeve të të gjitha llojeve dhe materialeve, të këpucëve, aksesoreve të ndryshëm dhe produkteve të kozmetikës, si dhe çdo produkti tjetër të ngjashëm me përshkrimin e mësipërm. Çdo lloj veprimtarie tjetër tregtare që nuk vjen në kundërshtim me ligjin.*

Kohëzgjatja e shoqërisë dhe aktiviteti i saj do të jenë për një afat të pacaktuar.

Me datë _____ palët kanë hartuar dhe nënshkruar statutin e shoqërisë INTER STOCK Albania SHPK, në të cilin është përcaktuar sa më sipër.

Referuar Statutit të ndërmarrjes së përbashkët, Asambleja e Përgjithshme merr vendime të cilat kërkojnë $\frac{1}{4}$ e votave përsa i përket: ndryshimeve në statut, zmadhimin dhe zvogëlimin e kapitalit, shpërndarja e fitimit, organizimi dhe prishja e shoqërisë, përcaktimi i politikave tregtare, planeve dhe strategjive të biznesit, kryerja e investimeve të paplanifikuara, organograma, shpërblimet dhe pagat e punonjësve etj.

Për sa më sipër, transaksioni i njoftuar konsiston në krijimin e një ndërmarrje të përbashkët me funksione të plota, INTER STOCK Albania SHPK nga shoqëritë AGNA SHA dhe INTER STOCK SHPK, transaksion, i cili është në përputhje me nenin 10 dhe 12 të ligjit nr. 9121, datë 28.07.2003, "Për mbrojtjen e konkurrencës", i cili është objekt autorizimi nga Komisioni i Konkurrencës.

III. Analiza e konkurrencës

Referuar nenit 3, pika 7, të ligjit nr. 9121, datë 28.07.2003 "Për mbrojtjen e konkurrencës", si edhe Udhëzimit nr. 76, datë 07.04.2008 "Për përcaktimin e tregut përkatës", treg përkatës do të konsiderohet tregu i shitjes me pakicë të veshjeve të të gjitha llojeve dhe materialeve, të këpucëve, aksesoreve të ndryshëm dhe produkteve të kozmetikës dhe treg përkatës gjeografik do të konsiderohet territori i Republikës së Shqipërisë.

Shoqëria AGNA SHA, pjesën më të madhe të të ardhurave e ka realizuar nga aktivitetet e tregtimit të cigareve, mallrave ushqimore dhe jo ushqimor etj dhe nuk ushtron aktivitet në tregun përkatës të prekur nga transaksioni.

Shoqëria INTER STOCK SHPK nuk zotëron ndonjë filial/ degë në Shqipëri.

Palët kanë deklaruar se krijimi i ndërmarrjes së përbashkët ka si qëllim hapjen e dyqaneve të specializuar për shitjen e veshjeve, të të gjitha llojeve dhe materialeve, të këpucëve, aksesoreve të ndryshëm dhe produkteve të kozmetikës, duke mundësuar hyrjen e një konkurenti të ri në treg.

Tregu i shitjes me pakicë të veshjeve të të gjitha llojeve dhe materialeve, të këpucëve, aksesoreve të ndryshëm dhe produkteve të kozmetikës, karakterizohet nga një numër i madh ofruesish, numër i madh produktesh me dhe pa markë dhe krijimi i ndërmarrjes së përbashkët INTER STOCK Albania SHPK nuk pritet të krijojë shqetësime për konkurrencën nëpërmjet krijimit apo forcimit të pozitës dominuese në tregun përkatës të produktit në Shqipëri.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 "Për mbrojtjen e konkurrencës",

VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët me funksione të plota, INTER STOCK Albania SHPK, nga shoqëritë AGNA SHA DHE INTER STOCK SHPK.

2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Lejda MATJA

Zv/Kryetar

Rezana KONOMI

Anëtar

Durim KRAJA

Anëtar

Denar BIBA

Kryetar

